



UNIVERSITÄTS-  
BIBLIOTHEK  
PADERBORN

# **Ethica Symbolica E Fabularum Umbris In Veritatis Lucem Varia Ervditione Noviter evoluta**

**Pexenfelder, Michael**

**Monachii, 1675**

5. Qua parte corporis pateat locus vulneri in animum.

---

[urn:nbn:de:hbz:466:1-68709](https://nbn-resolving.org/urn:nbn:de:hbz:466:1-68709)

tra comam abstruserat, veneno illita, necem sibi conscivit. Femina quaedam, de qua Lipsius meminit in monitis Pol. lib. 5. c. 93. ne Romanis se dedere cogeretur, filiolos duos injectis collo laqueis, ad pedes suos alligavit, & se à trabe suspendens tres impetu uno stragulavit. Ajax profectò minimè merebatur armis Achillis potiri, cujus animo longè impar fuit. Quidquid præclare gesserat, indomito mentis impetu, & ignominioso sine corruptit. Tantùm distat vincere alios, & vincere seipsum. Iterum Seneca: Imbecillus, ait, & ignavus est, qui propter dolorem moritur. Vir fortis non fugere debet è vita, sed exire. Et Martialis: Hic rogo non furor est, ne moriari, mori!

Nolo virum, facili redimit qui sanguine vitam.

Hunc volo, laudari qui sine morte potest.

Qui sustinendo vincit potiùs fortunam, quàm moriendo declinat.

Et Seneca Poëta in Thebaide: Non est virtus

Timere vitam, sed malis ingentibus

Obstare, nec se vertere ac retro dare.

Quod ipsum prædictus Epigrammaticus cecinit:

Rebus in adversis facile est contemnere vitam;

Fortiter ille facit, qui miser esse potest.

V. (e) Habent fabulæ, Herculem aliquando Salaminem venisse ad Telamonem, ibique cum Ajacem adhuc infantem conspexisset, circumdedisse illi τὴν λεοντήν, pellem leoninam suam, precatumque, ut quâ puer tegetetur illâ, invulnerabilis foret. Quod ita factum; fuisseque Ajacem toto corpore invulnerabilem, præterquam latere, id enim contactum non fuerat. Hinc Ovidius lib. 13. Metam. de Ajace:

Dixit, & in pectus tum demum vulnera passum

Quâ patuit ferro, lethalem condidit enses.

Per latus scilicet in pectus mucro penetravit. Quò docemur, parum esse, heroum exuviis regi, ferarum spoliis muniri, si latus domestico præbeas hosti. Poterat Ajax vir fortis, & planè Hercules videri, si quemadmodum pectus ac tergum pelle leonina obarmatum fuit, ita partem quoque corporis illam, in quam iræ & gladio aditus patebat, obmuniisset. Inevitabile vulnus est, quod ex intestino aggressu inferitur; nam dulce videtur perire telo, à quo plaga in suummet autorem venit. Per suum se latus provocavit, petiit, & interiit Ajax.

SYM.

(e) Qua parte corporis pateat locus vulneri in animum.